

**Meeqqat atuarfianni atuarnermut ilaatillugu sungiusaammik sulinermi assigiimmik sillimaserneqarnissaannut Naalackersuisut suliniuteqarnissaat pillugu inatsisartut aalajangiiffigisassaattut siunnersuut. Suliami tassani kommunit, Center for Arbejdsskadesikring (sillimasiisarnermut Qitiusoqarfik) attuumassuteqartullu allat sapinngisamik Naalackersuisunit akuutinneqartariaqarput.**  
*Inatsisartunut Ilaasortaq, Debora Kleist, Inuit Ataqatigiit*

## **Pillugu**

Ilinniartitaanermut, Kultureqarnermut, Ilisimatusarnermut Ilageeqarnermullu  
Ataatsimiititaliap

## **ISUMALIUTISSIISUTAA**

### **Siunnersuutip aappassaneernejarnerani saqqummiunneqartoq**

Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Mimi Karlsen, Inuit Ataqatigiit, Siulittaasoq  
Inatsisartunut ilaasortaq Vivian Motzfeldt, Siumut, Siulittaasup tullia  
Inatsisartunut ilaasortaq Laura Táunâjik, Siumut  
Inatsisartunut ilaasortaq Peter Olsen, Inuit Ataqatigiit  
Inatsisartunut ilaasortaq Henrik Fleischer, Partii Naleraq

UPA2017-mi ulloq 4. maj 2017 siunnersuutip siullermeernejarnerata kingorna siunnersuut  
ataatsimiititaliamit misissorneqarpoq.

### **1. Siunnersuutip imarisaa siunertaalu**

Nunatsinni tunngaviusumik atuarfimmi atuartut atuarnerminnut atatillugu suliffimmik sungiusaanerminni sillimaserneqartalernissaannik Naalackersuisut sulissuteqaqqullugit peqquneqarnissaat siunnersuuteqartumit kissaatigineqarpoq. Sillimasiineq ima qulakkeerneqassaaq nunatsinni atuarfinni atuartut tamarmik assigiimmik sillimaserneqartalersillugit. Taamatuttaaq soqutigisaqaqatigiit saniatigut kommunit aamma qitiusumik sulinermi sillimasiisarfik suleqatigeqqullugit Naalackersuisut peqquneqassapput.

## **2. Siunnersuutip inatsisartunit siummeerneqarnera**

Siunnersuutip siullermeerneqarnerani nunatsinni atuartut sulineranut sungiusarnerminni sillimmassiiffigineqartalernissaannik pilersitsinissaq inatsisartunit isumaqatigiittunit tunngaviatigut tapersorsorneqarpoq. Oqallinnermi ilaatigut kommunit ilaatinneqarnissaat pingaaruteqartoq erseqqissarneqarpoq.

## **3. Siunnersuutip ataatsimiititaliamit suliarineqarnera**

Aallaqqaasiullugu ataatsimiititaliamit pitsaasutut isigineqarpoq, Nunatsinni meeqqat atuartut silitillutik ajutuussagaluarpata imaluunniit sulineranut sungiusarnerminni ajutuussagaluarpata toqqissisimanarnerusumik ersarinnerusunillu siunnersuut manna aqqutigalugu aalajangersaasoqarniarnera. Tamatuma saniatigut siunnersuutip matuma akuersissutigineqarneratigut angajoqqaat kiisalu sulisitsisuugallartut meeqqat sulineranut sungiusartarneranni toqqissisimanerussasut ataatsimiititaliamit neriuutigineqarpoq. Tamatuma peqatigisaanik tunngaviusumik atuarfiup sillimmasiisimanginnera pissutaalluni atuartut suliffeqarfanni ullumikkut atuartunik suliffimmut sungiusartussanik tigusiumaneq ajortuni nassaarsinnaanissaannut oqilisaataasussatut isigineqarpoq.

Atuarfik pillugu inatsit maannakkut atuuttoq tunngavigalugu nunatsinni tunngaviusumik atuarfiit suliffimmut sungiusartitsisarnissaanik piumasqaateqanngitsoq ataatsimiititaliamit erseqqissaatigineqassaaq. Taamaattorli nunatsinni tunngaviusumik atuarfimmi atuartut amerlanersaasa suliffimmik sungiusartinneqartarnerat ingerlanneqartartoq ataatsimiititaliamit paasineqarsimavoq. Taamatuttaaq sulinermik sungiusarneq suliffeqarfeqarnerup silarsuaanut meeqqatta paasinninnerulernissaannut qitiulluinnartoq kiisalu qaqugu inersimasunngorunik suliffeqarluni inuuneranut piareersaatitut atorsinnaagaat ataatsimiititaliamit isumaqarfigineqarpoq. Tamakku saniatigut ilinniagassamik ingerlaqqiffiusumik toqqaasarnermi siusinaartumik suliffimmik misileraasarnerup, naak tamanna sivikittaraluartoq, iluaqutaassusia akulikitsumik oqaatigineqartarpoq.

Siunnersuut maannakkutut isikkoqartillugu akuersissutigineqassappat pissusissamisuussaaq Naalakkersuisut sillimaseeriaatsit assigiinngitsut periarfissiissutaat misissussappatigit. Naalakkersuisut aaqqiinissamut aningaasartuutissat kisiisa misissornagit aammali nunatsinni pisorta qarfinnut assigiinngitsunut sapinngisamik allaffissornermi suliassat minnerpaaffissaminiitineqarnissaasa misissorneqarnissaat tamatumunnga atatillugu Naalakkersuisunut ataatsimiititaliamit kaammattuutigineqassaaq – tamatumunnga atatillugu atuarfinnut, kommuninut aamma namminersorlutik oqartussat.

Tamatatumunnga atatillugu nunatsinni meeqqat atuartut sumiluunniit atuaraluarunik aamma najugaqaraluarunik siunnersuummi tunngavigineqartut malillugit tamarmik sillimmaserneqarnissaat Naalakkersuisut sulissutigissagaat ataatsimiititaliamit naatsorsuutigineqarpoq. Tamanna tunngavigalugu soqutigisallit allat saniatigut kommunit aamma Sulisillutik Ajoqusertunut Sullissivik Naalakkersuisut peqataatissagaat

ataatsimiititaliamit naatsorsuutigineqarluinnarpoq.

Atuarfik pillugu Inatsisartut inatsisaat nr. 15, 3. december 2012-imeersoq malillugu kommunit atuarfinnut akisussaasuupput. Inatsillu taanna malillugu atuarfinnut pingaarnertut akisussaasuullutik Naalackersuisut. Inatsisissatut siunnersuut manna akuerineqassagaluarpata tamatuma allangortinneqarnissaa ataatsimiititaliamit kissaatigineqanngilaq. Sumi najugaqarneq, atuarfimmi imaluunniit friskolimi sumi atuarneq aaqqiinermi uani pituttuisussaangimmat, sillimmaseeriaatsimut nunatta karsianit akilerneqarneqartumut allaffissornikkullu ingerlanneqartumut Naalackersuisut kommunillu akornanni akisissaaffiit agguataagaanerata akornusiisutut ataatsimiititaliamit isigineqanngilaq. Assersuutigalugu Danmarkimi nunatsinnit atuarfiit kommuninit ingerlanneqarfianni periuseq taanna atorneqarpoq.

Nunatsinni meeqqat atuartut sillimmaseerineqartarnissaat pillugu maanna inatsiseqanngilaq. Tamatuma malitsigaa kommunit sillimmasiinermut aaqqiineq kissaatigineqartoq malillugu suliniuteqaqqullugit peqquneqassappata imaluunniit sillimmaseeqqullugit peqquneqassappata pisariaqarpoq inatsisit allangortinneqarnissaat, tamannalu inatsisartunut saqqummiunneqartussaavoq. Inatsisinik suliaqarnermi malittarisassat tunngavigalugit suliamut attuumassuteqartut tusarniaaffigineqarnissaannik tamanna malitseqarpoq.

#### **4. Siunnersuutip aningaasanikkut kingunerisassai**

Inatsisartut suleriaasaanni § 33 imm. 1-imi takuneqarsinnaavoq, aalajangiussassatut siunnersuutip allaffissornermi aningaasatigullu kingunerisassai siunnersuutip tunngavilersuutaani allassimassasut.


Ataatsimiititaliamit maluginiarneqarpoq siunnersuutip piviusunngortinneqarnerani aningaasatigut kingunissaritinneqartut naatsorsuutigineqartunut naapertuuttut.

Siunnersuutip qanoq ilusilerneqarnissaa pineqarani pingaarnertut sillimmasiinissamik siunertaqarnera eqqarsaatigalugu siunnersuutip aningaasaqarnikkut kingunissaanik missingersuineq ilaatigut eqqoriaanermik aallaaveqarpoq. Allaffissornikkut aningaasartuutaasussat Ac-mik atorfillip ukiumut akissarsiaasa sisamararterutaata atorneqarnissaasa qaangerneqannginnissaat naatsorsuutigineqarpoq, tassa 125.000 kr. Tamatuma saniatigut danskit sillimmassiisarnernannut aningaasartuutaasartunut siunnersuut innersuussutitaqarpoq, tamannalu tunngavigalugu naatsorsuutigineqarluni siunnersuut annerpaamik 200.000 kr. pisortanut aningaasartuutaasasoq. Pisortanut, namminersortunut imaluunniit inunnut ataasiakkaanut aningaasartuutitaqarnissaanut tunngatillugu ataatsimiititaliaq allanik oqaaseqarnissaminut tunngavissaqarsorinngilaq.

#### **Ataatsimiititaliap inassuteqaatai**

Ataatsimiititaliap **isumaqatigiittup** siunnersuutip **akuersissutigineqarnissaa** inassutigaa.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaanniingassanngortippaa.



Mimi Karlsen  
Siulittaasoq



Vivian Motzfeldt  
Siulittaasup tullia



Laura Táunâjik



Peter Olsen



Henrik Fleischer